

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U VISOKOM
Broj: 41 0 K 103018 24 K

Visoko, 01.10.2024.godine

U IME FEDERACIJE BOSNE I HERCEGOVINE

Općinski sud u Visokom, po sudiji Avdiji Avdić uz sudjelovanje zapisničara Sejdić Džemile, u krivičnom predmetu protiv optuženog M.V. sina H. iz O., zbog krivičnog djela nasilje u porodici iz člana 222. stav 2. u vezi sa stavom 1. KZ FBiH, rješavajući po optužnici Kantonalnog tužilaštva-tužiteljstva Zeničko-dobojskog kantona broj T 04 0 KT 0057174 24 od 04.07.2024.godine, nakon zaključenog glavnog javnog pretresa, održanog dana 01.10.2024.godine u prisustvu Kantonalnog tužitelja Dženaide Kopic i optuženog M.V., na pretresu za objavljivanje presude, u prisustvu kantonalnog tužitelja i optuženog, dana 01.10.2024.godine, donio je i javno objavio :

P R E S U D U

OPTUŽENI: M.V., sin H. i majke M. rođene A., rođen ... godine u mjestu N., općina H.P., nastanjen u mjestu O., ulica K. bb, općina O., po narodnosti Bošnjak, državljanin BiH, JMB: ..., pismen, sa završenom osnovnom školom, po zanimanju radnik, oženjen, otac dvoje djece, nezaposlen, vojsku nije služio i ne vodi se u vojnoj evidenciji, srednjeg imovnog stanja, osuđivan, trenutno na izdržavanju kazne zatvora u KPZ poluotvorenog tipa u Sarajevu, Odjeljenje u Ustikolini,

K R I V I J E

što je,

dana 05.02.2024. godine, oko 06,00 sati, na području općine O., u porodičnoj kući koja se nalazi u ulici K., u kojoj živi sa svojom suprugom A.I.-V., svjestan svoga djela i postupaka, što je i htio, počinio je psihičko i fizičko nasilje nad svojom suprugom A.I.-V na način da je nakon verbalnog sukoba i svađe, a povodom slika i fotografija na „Facebook“ profilu koje je A.I.-V mu pokazala, počeo je da galami i psuje A.I.-V riječima: „ Jebo te tvoj otac, kurvo jedna“, a zatim se obratio njihovom malodobnom djetetu i rekao: „Majka ti je kurva“, misleći na A.I.-V, te dok su se tako svađali i prepirali, uhvatio je za kosu i bacio na krevet, nakon čega je nastavilo naguravanje između njih dvoje, uslijed čega je A.I.-V zadobila povredu „domalog“ prsta desne ruke, na koji način je ugrozio mir, tjelesnu cjelovitost i psihičko zdravlje svoje supruge A.I.-V,

dakle, nasiljem i drskim ponašanjem ugrozio mir, tjelesnu cjelovitost i psihičko zdravlje člana svoje porodice,

čime je počinio krivično djelo Nasilje u porodici iz člana 222. stav 2. u vezi sa stavom 1. KZ F BiH.

Pa sud optuženom na osnovu istog zakonskog propisa: te na osnovu članova: 42., 49. i 62. KZ FBiH, i z r i č e

U S L O V N U O S U D U

Kojom se optuženom za počinjeno krivično djelo utvrđuje kazna zatvora u trajanju od 3 (tri) mjeseca , a koja se neće izvršiti ako optuženi za vrijeme od 2 (dvije) godine ne počini novo krivično djelo.

Na osnovu čl.202 stav 4 ZKP FBiH optuženi se oslobađa plaćanja troškova krivičnog postupka i isti padaju na teret budžetskih sredstava suda.

Obrazloženje

Kantonalno tužilaštvo Zeničko-dobojskog kantona (u daljem tekstu KT ZDK), optužnicom broj T 04 0 KT 0057174 24 od 04.07.2024.godine , optužilo je M.V., zbog krivičnog djela nasilje u porodici iz člana 222. stav 2. u vezi sa stavom 1. KZ F BiH, (Službene novine Federacije BiH br. 36/03, 37/03, 21/04, 69/04, 18/05, 42/10, 42/11, 59/14, 76/14, 46/16 i 75/17), (dalje u tekstu KZ FBiH).

Optužnica je potvrđena od strane sudije za prethodno saslušanje ovog suda dana : 10.07.2024.godine. Dana 10.09.2024.godine na ročištu o izjašnjenju o krivnji, optuženi M.V. je izjavio da nije kriv za krivično djelo koje mu se stavlja na teret.

Na glavnom pretresu održanom 01.10.2024.godine , prije izvođenja dokaza, optuženi M.V. priznao je krivnju za krivična djela nasilje u porodici iz čl.222 st.2 u vezi sa stavom 1 KZ FBiH, a njegovo priznanje je prema ocjeni ovog suda u saglasnosti sa dokazima u koje je sud izvršio uvid i to: - zapisnik o saslušanju svjedoka od 29.03.2024.g. i 5.2.2024.godine- oštećena A.I.-V, kći A. iz O., K. bb, zapisnik o saslušanju svjedoka - M.H., sin O., policijski službenik PS Olovo, ul. K. bb, O., Rješenje Općinskog suda u Visokom-Odjeljenje u Olovu broj: 41 1 Pr 012225 24 Zm od 05.02.2024. godine, Nalaz i mišljenje ljekara specijaliste SHMP Olovo od 05.02.2024. godine, Rješenje Općinskog suda u Visokom broj: 41 0 K 091824 23 Iks 2 od 06.02.2024. godine, Dopis Općinskog suda u Visokom KPZ-u Sarajevo, Odjeljenje izdržavanja kazne broj: 41 0 K 091824 23 Iks 2 od 02.02.2024. godine, Uputni akt Općinskog suda u Visokom broj: 41 0 K 091824 23 Iks 2 od 02.02.2024. godine, Rješenje o izmjeni rješenja Općinskog suda u Visokom broj: 41 0 K 091824 23 Iks 2 od 02.02.2024. godine i izvod iz kaznene evidencije za osumnjičenog M.V.PS Han Pijesak od 05.02.2024. godine.

Optuženi u završnoj riječi izjavio da mu je žao što se sve to desilo, jednostavno bio je nedorazum u komunikaciji, obećajem da se to sigurno više neće ponoviti. U dobrim sam odnosima sa suprugom, odmah poslije tog događaja sve je u redu, molim sud da mi izrekne uslovnu osudu i oslobodi plaćanja troškova postupka.

Sud je ovo priznanje krivnje optuženog ocijenio kao jasno, iskreno i nedvosmisleno ničim uslovljeno tako da je priznanje optuženog u saglasnosti sa materijalnim dokazima, naprijed navedenim, u koje je sud izvršio uvid, na osnovu čega van svake sumnje proističe da je optuženi ostvario sva bitna obilježja bića krivičnih djela koje mu se stavljaju na teret, odnosno : krivično djelo Nasilje u porodici iz člana 222. stav 2. u vezi sa stavom 1. KZ F BiH.

Po ocjeni suda optuženi je navedeno predmetno krivično djelo učinio direktnim umišljajem jer je bio svjestan svog djela i htio je njegovo izvršenje, a sud je utvrdio da je optuženi prilikom izvršenja krivičnog djela bio uračunljiv, jer predloženim dokazima nije dovedena u sumnju mogućnost optuženog da shvati značaj svog djela i da upravlja svojim postupcima u vrijeme izvršenja djela, te su se u njegovim radnjama stekla sva bitna obilježja bića krivičnog djela nasilje u porodici iz člana 222. stav 2. u vezi sa stavom 1. KZ F BiH.

Prilikom izricanja krivično pravne sankcije sud je cijenio optuženom M.V.u kao olakšavajuće okolnosti činjenicu da je priznao izvršenje krivičnog djela koje mu se stavlja na teret, čime je u mnogome doprinio utvrđivanju činjeničnog stanja i skraćanju krivičnog postupka, kao i okolnosti koje je optuženi naveo u svom iskazu prilikom priznanja krivnje. Dok je od otežavajućih okolnosti sud uzeo u obzir raniju osuđivanost optuženog i činjenicu da nije osuđivan za istovrsno krivično djelo. Cijeneći utvrđene okolnosti na strani optuženog, sud je optuženom M.V.u za navedeno krivično djelo utvrdio kazna zatvora u trajanju od 3 (tri) mjeseca , a koja se neće izvršiti ako optuženi za vrijeme od 2 (dvije) godine ne počini novo krivično djelo. Po mišljenju ovog suda izrečena sankcija srazmjerna je stepenu odgovornosti optuženog i težini počinjenih krivičnih djela koja mu se stavljaju na teret, te će se istom postići svrha kažnjavanja, kako sa aspekta generalne, tako i specijalne prevencije predviđena članom 42. KZ FBiH.

Na osnovu člana 202. stav 4. ZKP FBiH sud je optuženog oslobodio plaćanja troškova krivičnog postupka i isti padaju na teret budžetskih sredstava suda.

Sudija
Avdija Avdić

PRAVNA POUKA:

Protiv ove presude dozvoljena je žalba Kantonalnom sudu Zenica u roku od 15 dana po prijemu iste, a žalba se podnosi ovom sudu u tri primjerka.